

ՍԱՄՎԵԼ ՊՈՂՈՍՅԱՆ

պատմական գիտ. թեկնածու

ՀԱՅԿԱԿԱՆ ԶԻՆՈՒԺԻ ԴԵՐԸ ՊԱՂԵՍՏԻՆՅԱՆ ՌԱԶՄԱՃԱԿԱՏՈՒՄ 1918 Թ.

Ուաջին աշխարհամարտի ընթացքում Պաղեստինյան ռազմաճակատի խոշորագույն եւ վճռորոշ ճակատամարտը հայտնի է Մեզի-դոյի (Արմազեդոնի) ճակատամարտ անունով: Այն տեղի է ունեցել 1918 թ. սեպտեմբերի 19-25-ը, որի արդյունքում այնտեղ տեղակայված թուրքական երեք բանակները գլխովին ոչնչացվեցին: Դա, ի վերջո, հանգեցրեց Օսմանյան կայսրության անձնատվությանը:

Վերոնշյալ ռազմագործողությանը մասնակցություն է ունեցել նաև հայ զինվորականությունը: Բրիտանաֆրանսիական զորախմբի կազմում գործում էր Կիպրոսում հայ կամավորներից կազմավորված Հայկական (Արեւելյան) լեգեոնը, որն աչքի ընկավ Ռաֆաթ-Արարայի տեղամասում: Թուրքական բանակի կապիտան, Դարդանելի ճակատամարտում հերոսացած Սարգիս Թորոսյանը եւս թուրքերի ջախջախման գործում որոշակի դեր է ունեցել:

Հետաքրքիր է նշել, որ հայ պատմագիտությունը շրջանառության մեջ է դրել Արարայի ճակատամարտ անվանումը՝ Մեզիդոյի փոխարեն, քանի որ Հայկական լեգեոնը կանգնած էր Արարայի բարձունքների մոտ: Իրականում 100 կմ ձգվող ռազմաճակատի մոտ 5,3 կմ երկարությամբ տարածքում՝ Զավիյա բնակավայրից մինչև Ռաֆաթ-Արարայի բարձունքները, կանգնած էր ֆրանսիական զորախումբը, որի կազմում էին Հայկական լեգեոնի երկու գումարտակները: Ինչպես կտեսնենք, իրականում հայկական զորամասը գրոհեց Ռաֆաթի բարձունքների վրա՝ Արարայի հարևանությամբ: Սակայն Ս. Պարթեյանն իր «Արարա» հուշագրքույկով շրջանառության մեջ դրեց Արարայի ճակատամարտ հասկացությունը, որը մոտավ հայ պատմագրության մեջ¹: Տ. Պոյաճյանն իր հուշագրության մեջ առաջին անգամ փաստագրական նյու-

¹ Տես Ս. Պարթեյան, Արարա: Հայկական լեգեոնը, Իզմիր, 1919:

թի հիման վրա ցույց է տվել, որ հայկական գորախումբը կռվել է ոչ թե Արարայում, այլ դրա հարեանությամբ՝ Ռաֆաթում, իսկ Արարայում բրիտանական 10-րդ դիվիզիայի հնդկական զորամասերն էին²:

Քանի որ Պաղեստինյան ռազմաճակատի գործողությունները եւ Հայկական լեգեոնի պատմությունը հայ պատմագիտության կողմից գիտական լուրջ ուսումնասիրության չի ենթարկվել, դա պատճառ է դարձել, որ այդ իրադարձություններից մեկ դար անց հայ իրականության մեջ դեռեւս Մեզիդոյի ճակատամարտը եւ դրանում Հայկական լեգեոնի իրական դերը չի լուսաբանվել: Ուսումնասիրության նպատակն է ցույց տալ Պաղեստինի թուրքական բանակի ջախջախման գործում հայերի ներդրումը:

Դեռեւս 1916 թ. վերջից Կիպրոսում Ֆրանսիայի կողմից կազմավորվել էր Հայկական լեգեոնը, որի երկու գումարտակները 1918 թ. ապրիլ-մայիս ամիսներին տեղափոխվել էին Եգիպտոս, իսկ ամռանը՝ Պորտ Սայիդ-Քանթարա-Ռամլե-Լյուդ գծով Պաղեստինյան ռազմաճակատ: Օգոստոսի 30-ին լեգեոնը ճամբար էր խփել ռազմաճակատի առաջավոր գծից մոտ 7 կմ հեռավորության վրա³: Հաջորդ օրը Ա. գումարտակը տեղափոխվել էր առաջին գիծ⁴, սեպտեմբերի 15-ին Բ. գումարտակը եւս գիշերով երեքժամյա անցումով տեղափոխվել էր առաջին գիծ: Ա. գումարտակը, որը երկու շաբաթ առաջավոր գծում էր, տեղափոխվեց երկրորդ գիծ⁵:

Այս շրջանում Պաղեստինյան ռազմաճակատի բրիտանա-ֆրանսիական եւ թուրք-գերմանական բանակների շփման գիծն անցնում էր Երուսաղեմ ու Նաբլուս քաղաքների միջև ընկած շրջանով եւ ձգվում էր Հորդանան գետից մինչեւ Միջերկրական ծով: Դեռեւս 1918 թ. մարտ-ապրիլ ամիսներին բրիտանական զորքերը երկու անգամ փորձել էին ճեղքել հակառակորդի պաշտպանությունը, բայց անհաջողություն էին կրել: Դրանից հետո կողմերի միջև հարաբերական անդորր էր հաստատվել, եւ նրանք զբաղվել էին ուժերը վերադասավորելով:

Թուրքերը հույս ունեին, որ կարող են հետ մղել հակառակորդին՝ կառչելով Սամարիայի լեռնային, բնականից անառիկ դիրքերին, որոնք

² Տե՛ս Տ. Պոյաճեան, Հայկական լեգեոնը: Պատմական Յուշագրություն, Ուօթթաուն, 1965, էջ 142:

³ Տե՛ս Ռ. Գասպարյան, Հայկական լեգեոնը (1916-1920 թթ.), «Հայկական բանակ», 1996, թ. 1, էջ 8:

⁴ Տե՛ս «Ատանայի Հայոց պատմություն», խմբագրեց՝ Բիզանդ Եղիայեան, Անթիլիաս, 1970, էջ 426:

⁵ Տե՛ս «Արարա», Նուիրուած Արարայի հինգերորդ տարեդարձին, 1923, Պոսթոն, էջ 8:

ամրացվել էին գերմանական մասնագետների կողմից: Թուրքիայի ռազմական նախարար Էնվերը պաշտպանական այդ հզոր գծի հետ մեծ հույսեր էր կապում եւ այն անվանում էր «երկրորդ Դարդանեկ»⁶: Նա հույս ուներ, որ այդտեղ եւս կկարողանան կասեցնել հակառակորդի մեծաթիվ ուժերը, ինչպես Դարդանեկի օպերացիայի ժամանակ:

Եգիպտական ռազմարշավային զորքերի գլխավոր հրամանատար, բրիտանական գեներալ Էդմունդ Ալենքին որոշել էր թշնամուն վճռական հարված հասցնել սեպտեմբերին: Տեղանքը հիմնականում լեռնային էր, եւ հակառակորդի դիրքերը գրավելը մեծ դժվարությունների ու զոհերի հետ էր կապված: Սակայն նույնիսկ հաջողության դեպքում թշնամին նահանջից հետո կարող էր զբաղեցնել նոր պաշտպանական գիծ: Ալենքին որոշել էր այնպիսի հարված հասցնել, որով ամբողջությամբ կջախջախեր թշնամուն եւ թույլ չէր տա պաշտպանության նոր գիծ ստեղծել: Վճռական հարձակման հաջողությունը հիմնականում կախված էր թշնամու համար հարվածի ուղղության անսպասելիությունից, հանկարծակիությունից եւ ուժգնությունից:

Պաղեստինում գերմանաթուրքական զորքերի գլխավոր հրամանատար, գերմանացի գեներալ Լիման ֆոն Սանդերսը գլխավոր հարձակումը սպասում էր ռազմաճակատի արեւելքից՝ Ամմանի ուղղությամբ, քանի որ նախկինում հենց այս թեւից էին բրիտանական ուժերը հուժկու գրոհներ կազմակերպել: Սակայն այս անգամ Ալենքին որոշել էր հարվածն ուղղել արեւմտյան հատվածից: Նա որոշել էր Միջերկրականի առափնյա շրջանով՝ Սարոնի դաշտով, հեծելագործի սրընթաց գրոհով ճեղքել հակառակորդի պաշտպանական գիծը, դուրս գալ թշնամու թիկունք եւ գրավել Հայֆան ու Նաբլուսը, որով կկտրվեր Պաղեստինի թուրքական ուժերի նահանջի ճանապարհը: Իսկ Ամմանից Դամասկոս երկաթուղային ճանապարհով թուրքերի նահանջի ուղին փակելու էր Մեքքայի շերիֆ Հուսեյնի որդի Էմիր Ֆեյսալի արաբական բանակը: Փաստորեն, Ալենքին որոշել էր թուրքական պաղեստինյան բանակը վերցնել շրջապատման մեջ եւ ամբողջությամբ ոչնչացնել, որի արդյունքում հակառակորդը այլեւս որեւէ լուրջ դիմադրություն չէր կարողանա ցույց տալ դեպի Լիբանան ու Սիրիա շարժվող բրիտանա-ֆրանսիական բանակին:

Պաղեստինյան ռազմաճակատում սեպտեմբերյան խոշոր հաղթանակի գործում անուրանալի դեր ունեցավ այն հանգամանքը, որ բրիտանական հրամանատարությունը կարողացավ գաղտնի պահել հար-

⁶ Տե՛ս «Կամաուրը» (Արաբայի յաղթանակի 10-րդ տարեդարձի առթիւ), Գահիրե, 1928, էջ 34:

վածի գլխավոր ուղղությունը եւ գորքերի բոլոր տեղաշարժերը: Եգիպտական ռազմարշավային կորպուսում լոնդոնյան լրատվամիջոցների պաշտոնական թղթակից Վիլյամ Մեսին խոստովանում է, որ գորքերի քողարկումը այնքան լավ էր կազմակերպվել, եւ հրամանատարությունը այնքան գաղտնի էր հարձակողական պլանները մշակել, որ ինքը, գրեթե մշտապես գտնվելով գլխավոր շտաբում եւ բազմիցս այցելելով տարբեր զորամասեր, միայն հարձակումից մեկ օր առաջ էր տեղեկացել գորքերի տեղաշարժի եւ վճռական հարձակման մասին, այն էլ՝ հրամանատարությունից⁷:

Է. Ալենբիին հաջողվեց գորքերի տեղաշարժերն աննկատ իրականացնել եւ հարձակման հիմնական ուղղությունը գաղտնի պահել թշնամուց: Մեպտեմբերի 18-ին՝ հարձակումից մեկ օր առաջ, գերմանական ինքնաթիռը հետախուզական թռիչք էր իրականացրել հակառակորդի դիրքերի վրայով, սակայն օդաչուն որեւէ տեղաշարժ եւ գորքերի նոր կենտրոնացում չէր կարողացել հայտնաբերել: Միայն ֆրանսիական զորախմբի կազմում նկատել էր Հայկական լեգեոնի համալրումը, որը համարել էր իտալական զորամաս⁸:

Մեգիդոյի ճակատամարտի նախօրյակին Պաղեստինյան ռազմաճակատի գլխավոր Միջերկրականի ափից ձգվում էր մինչեւ Մեոյալ ծով՝ մոտ 95 կմ: Տարբեր աղբյուրների համադրմամբ հստակեցրել ենք ռազմաճակատի գծում բրիտանական եւ թուրքական զորքերի, ինչպես նաեւ հայկական զորամասի տեղաբաշխումը, նրանց առջեւ դրված խնդիրները⁹: Բացի Միջերկրական ծովին հարող նեղ հատվածից՝ Սարոնի դաշտից, որը Բիր Ջեյթ բնակավայրից ձգվում էր մինչեւ Ռոշ-Հաային, մնացած տարածքները լեռնային կտրատված տեղանք էին, որտեղ թուրք-գերմանական ուժերը հաջողությամբ կարող էին կասեցնել հակառակորդին: Եգիպտական ռազմարշավային զորքերը կազմված էին երեք՝ Անապատային հեծյալ (հրամ.՝ ավստրալիացի գեներալ-լեյտենանտ Հենրի Շոփել), 21-րդ (հրամ.՝ գեներալ-լեյտենանտ Էդուարդ Բուլֆին) եւ 20-րդ (հրամ.՝ գեներալ-լեյտենանտ Ֆիլիպ Չեթվուդ) կորպուսներից եւ գեներալ Է. Չայթոբսի զորախմբից:

Գերմանացի գեներալ Լիման ֆոն Սանդերսի ղեկավարած թուրքական «Յըլդըրըմ» (կայծակ) զորամիավորումը կազմված էր 4-րդ (հրամ.՝ Մերսինլի Մեհմեդ Ջեմալ փաշա), 7-րդ (հրամ.՝ Մուստաֆա Քեմալ փա-

⁷ Տե՛ս W. Massey, *Allenby's final triumph*, London, 1920, էջ 96:

⁸ Տե՛ս S. Պոյաճեան, նշվ. աշխ., էջ 146:

⁹ Տե՛ս անդ, էջ 144-145: W. Massey, նշվ. աշխ., էջ 111-112, 126-129, 147:

շա), 8-րդ (հրամ.՝ Իսմայիլ Ջեմալ Չոբանլի փաշա) բանակներից: 8-րդ բանակի կազմի մեջ էր գերմանական Ասիա կորպուսը (հրամ.՝ Գուստավ ֆոն Օպեն), որը աչքի էր ընկնում բարձր մարտունակությամբ¹⁰:

Բրիտանական 21-րդ կորպուսի 54-րդ դիվիզիայի կազմում էր Պաղեստինի եւ Սիրիայի ֆրանսիական զորախումբը (հրամ.՝ գնդապետ Ֆիլիպ դը Պիեպպ), որը զբաղեցրել էր Զավիայից մինչեւ Ռաֆաթ-Արարայի բարձունքները՝ 5.3 կմ լայնությամբ լեռնային տարածքը: Այն կազմված էր Արեւելյան լեզեոնի հայկական 1-ին եւ 2-րդ գումարտակներից, սիրիացիների մի վաշտից, Ալժիրյան հրացանակիրների 1-ին գնդի 7-րդ եւ 2-րդ գնդի 9-րդ գումարտակներից, հեծյալ էսկադրոնից:

Անապատային հեծյալ կորպուսը կանգնած էր 21-րդ կորպուսի թիկունքում: Վերջինիս խնդիրն էր ջախջախել թշնամու աջ թևը եւ հասնել Դեյր Շարաֆ-Սամարիա-Թուկարմ գծին: Հետեւագործի ուժերով հակառակորդի պաշտպանությունը ճեղքելուց հետո Անապատային հեծյալ կորպուսը պետք է ձախից շրջանցեր 21-րդ կորպուսը եւ սրընթաց գրոհեր Աֆուլայի եւ Բեյսանի վրա՝ կտրելով հակառակորդի երկաթուղային ուղին եւ փակելով նրա նահանջի ճանապարհը: 20-րդ կորպուսը պետք է գրոհեր Ռաֆաթից-Բեյթ Լաբան գծի վրա: Արարայից Քաֆր ալ-Դիք հատվածը զբաղեցրեց 10-րդ հնդկական դիվիզիան:

Զավիայից մինչեւ Բերութին ձգվող լեռնային հատվածում կանգնած էին թուրքական Ջախսակողմյան կորպուսի (հրամ.՝ Գուստավ ֆոն Օպեն) 19-րդ, 16-րդ հետեւակային, 2-րդ հեծելագորային դիվիզիաները եւ գերմանական «Ասիա» կորպուսը:

Պաղեստինյան ռազմաճակատում հակառակորդ բանակների թվաքանակի մասին պատմագիտության մեջ տարբեր թվեր են նշվել: Որոշ հեղինակներ թուրքական զորքերի թիվը ցույց են տալիս 30-50 000, իսկ բրիտանականինը՝ 70-76 000¹¹: Ըստ թուրքական բանակի կապիտան Սարգիս Թորոսյանի՝ Պաղեստինյան ճակատում թուրքերն ունեին 120 000 զինվոր, բրիտանացիները՝ 150 000¹²: Վերջին թիվը, մեր կարծիքով, ավելի հավանական է, եթե հաշվի առնենք ճակատամարտի արդյուն-

¹⁰ Տե՛ս <http://web.archive.org/web/20110605134841/http://www.sacktrick.com/igu/germancolonialuniforms/hist%20ottoman.htm>

¹¹ Տե՛ս Ը. Թորոսյան, Կիլիկիայի հայերի ազգային-ազատագրական շարժումները 1919-1920, Երևան, 1987, էջ 66-67: Տ. Պոյաճեան, նշվ. աշխ., էջ 114: Ե. Лудшувейт, Турция в годы первой мировой войны 1914-1918 гг. Военно-политический очерк, Москва, 1966, էջ 282-283:

¹² Տե՛ս Ս. Թորոսյան, Դարդանելից մինչեւ Պաղեստին, թարգմանեց անգլերեն ընագրից Լիլիթ Թութիսյանը, Երևան, 2012, էջ 154:

քում գերված թուրքերի թվաքանակը, ինչպես նաև հեղինակի իրազեկվածությունը:

1918 թ. սեպտեմբերի 18-ի լույս 19-ի գիշերը սկսվեց Մեզիդոյի ճակատամարտը, որը վճռելու էր Պաղեստինյան ռազմաճակատի ճակատագիրը: Ընդհանուր հարձակման համար ընտրված էր 4.30 թոպեն, երբ լուսինը այլևս չէր լուսավորի, եւ հնարավոր կլիներ հետեւակը մոտեցնել թշնամու դիրքերին՝ անսպասելի եւ արնթաց գրոհի համար, որը թույլ կտար նվազեցնել զոհերի քանակը: Առաջինը պետք է գրոհեր 54-րդ դիվիզիան, որի մեջ էր նաև ֆրանսիական զորախումբը: Նրանք հարձակման էին գնալու 10 թոպե շուտ՝ 4.20: Նրանց դիմաց լեռնային լավ ամրացված դիրքեր էին, եւ նրանք լեռների ստորոտներից պետք է առաջինը գնային հարձակման¹³: 54-րդ դիվիզիայի խնդիրն էր շեղել թուրքերի ուշադրությունը հարձակման գլխավոր ուղղությունից:

Հարձակումից երեք ժամ առաջ՝ մեկն անց տասնհինգին, ավատարաւիացի օդաչու, կապիտան Ռոս Սմիթին հաջողվեց ուժակոծել եւ ամբողջությամբ ավերել Աֆուլայում գտնվող հեռագրական կայանը: Քաղաքի ռազմավարական կետերի վրա նետվեց 16 հատ 50 կգ-ոց ռումբ: Դրա շնորհիվ թուրքական գլխավոր շտաբի հեռագրական եւ հեռախոսային կապը ռազմաճակատի հետ կտրվեց: Նաբլուսի շտաբը եւ կապի կետերը նույնպես ուժակոծվեցին: Արդյունքում թուրքական գլխավոր հրամանատարությունը երկու օր տեղյակ չէր, թե ինչ է կատարվում առաջին գծում¹⁴:

Համընդհանուր հարձակման ազդանշան հանդիսացավ հրետանային կրակը, որը հիմնականում ուղղված էր թուրքերի գլխավոր կրակակետերին: Լավ հաշվարկված հրետանային համագործակցություն ոչնչացրին թշնամու հրետանու զգալի մասը, որի արդյունքում թուրքական հրետանին չկարողացավ մեծ վնասներ հասցնել հարձակվող հետեւագործին: Բրիտանական հրետանու անմիջական հարվածի տակ հայտնվեցին նաև թշնամու շտաբները եւ հեռախոսային կայանները¹⁵: Հարվածի անսպասելիությունն ու ուժգնությունը այնքան մեծ էր, որ հարձակման բոլոր ուղղություններում առաջին տասը թոպենների ընթացքում գրավվեցին հակառակորդի առաջին շարքի խրամատները¹⁶:

¹³ Տե՛ս **W. Massey**, նշվ. աշխ., էջ 122:

¹⁴ Տե՛ս **F. Cutlack**, *The Australian Flying Corps in the western and eastern theatres of war 1914-1918*, Sydney, 1941, էջ 152:

¹⁵ Տե՛ս **W. Massey**, նշվ. աշխ., էջ 123:

¹⁶ Տե՛ս անդ, էջ 125:

Հայկական լեզեոնի առաջ խնդիր էր դրված գրավել Արարայից դեպի ձախ գտնվող բավական լավ ամրացված երկու դիրքերը¹⁷: Ռաֆաթ-Արարան 350 մետր բարձրությամբ եւ 3 կմ ձգվող լեռ էր: Հայկական զորախումբը կանգնած էր Ռաֆաթի դիմաց, իսկ Արարայի ուղղությամբ՝ բրիտանական 10-րդ դիվիզիայի հնդկական զորամասերն էին¹⁸:

Հայկական լեզեոնը հանձնարարություն ստացավ գրավել Ռաֆաթի բարձունքը, որը ռազմաճակատի ամենադժվար ու գրեթե անատիկ հատվածներից էր համարվում: Մինչ այդ դաշնակիցների զորքերը երեք անգամ փորձել էին գրավել այդ դիրքերը, բայց թշնամին հետ էր շարտել նրանց¹⁹: Արարայից ձախ Ռաֆաթ գյուղն էր, որի դիմաց սիրիական զորախումբը կանգնեց, իսկ այդտեղից ավելի ձախ հայկական դիրքերն էին, որոնք ձգվում էին ավելի քան երեք կիլոմետր: Դրանք երեք բլուրներ էին, որոնց վրա հակառակորդը իրար հաջորդող երեք պաշտպանական գիծ էր կառուցել: Հայկական զորախմբի 600 զինվորների դիմաց կանգնած էին 1000 թուրք եւ 600 գերմանացի զինվոր²⁰:

1918 թ. սեպտեմբերի 18-ի երեկոյան լեզեոնի Բ. գումարտակը հրաման ստացավ նախապատրաստվել հաջորդ օրվա գրոհին, որը փաստորեն առաջին լուրջ մարտական մկրտությունն էր լինելու հայ կամավորների համար: Իսկ լեզեոնի Ա. գումարտակը ճակատամարտի ժամանակ պահեստային ուժերի մեջ էր մնալու²¹:

Հետաքրքիր է, որ թուրքերի վրա հոգեբանական ճնշում գործադրելու նպատակով հարձակման նախօրեին բրիտանական ինքնաթիռը թշնամու թիկունքում թռուցիկներ տարածեց, որոնց մեջ գրված էր, որ նրանց դեմ կանգնած է 60 000-ոց հայկական բանակ²²: Փաստորեն՝ աշխարհի հզորագույն կայսրության ներկայացուցիչները թուրքերին վախեցնում էին ոչ թե իրենց բանակով, այլ՝ հայկական լինելու հանգամանքով:

Սեպտեմբերի 19-ի արշալույսին սկսվեց ընդհանուր հարձակումը: Հայկական լեզեոնը մի քանի ժամ տևած համառ մարտերից հետո կարողացավ սվինամարտով թուրքերին դուրս շարտել առաջապահ դիրքերից: *«Թուրքը որ անպաշտպան եւ անզէն հայերը մորթելու մէջ*

¹⁷ Տե՛ս «Պատմություն Ս.Բ.Հնչակեան կուսակցութեան 1887-1963», խմբ.՝ Ա.Կիստուր, հ. Բ., Պէյրոթ, 1963, էջ 342:

¹⁸ Տե՛ս Տ. Պոյաճեան, նշվ. աշխ., էջ 142-143:

¹⁹ Տե՛ս Խ. Աճեմեան, Հայկական լեզեոնը, «Համազգային»-ի տարեգիրք, 1953, էջ 73:

²⁰ Տե՛ս «Արարա», էջ 6:

²¹ Տե՛ս Գ. Լազեան, Հայաստան եւ Հայ Դատը (Վաւերագրեր), Գահիրէ, 1946, էջ 192:

²² Տե՛ս Մ. Թաթարեան, Կամաւորի մը յուշերը, Անթիլիաս, 1960, էջ 15:

այնքան ճարպիկություն և քաջություն ցույց տուած էր,- գրում է ճակատամարտի մասնակից Մ. Թաթարյանը,- հայ կամատորին զենքին դեմ ընկրկեցաւ և իր ամրակոտ դիրքերուն առաջին գիծը լքելով անցաւ երկրորդ դիրքերուն»²³:

Շարունակելով հաջող հարձակումը՝ հայ զինվորները գրավեցին նաեւ պաշտպանական երկրորդ և երրորդ բնագծերը: Դրանով հայ մարտիկների վերահսկողության տակ հայտնվեց Ռաֆաթից արեւմուտք ընկած լեռնաշղթան, իսկ երբ թուրքերը փորձեցին հակագրոհ կազմակերպել, հայ զինվորները համատորեն պաշտպանեցին «Երեք թփուտներ» կոչվող բարձունքը²⁴:

Ժամը 15-ին բրիտանական հրամանատարությունը հրահանգեց շարունակել առաջխաղացումը: Լեգեոնականները նետվեցին մարտի և ջախջախեցին թշնամուն²⁵:

Հայ մարտիկների կողմից Ռաֆաթի բարձունքների գրավումը նպաստեց Արարայի, Մեսհայի և Պետիեյի դիրքերի անձնատուր լինելուն²⁶:

1918 թ. սեպտեմբերի 22-ին մորն ուղարկած նամակում Հաբեթ Իսկենդերյանը գրում է. «Ամսոյս 19-ին շղթայագերծուեցաւ մեր յարձակողականը. մինչեւ հիմայ 5000-է ատելի գերի և 100-ի մօտ թնդանօթներ ձեռք բերուեցան: Զոհեր ունեցանք, որոնց մէջ նաեւ կային մեր ընկերներէն պաշտելի հոգիներ: Ես ոչ վերք ունիմ, ոչ քան. ողջ առողջ եմ, թէեւ հրաշքով ազատուած: Առաջին իսկ օրը քսան մղոն յառաջխաղացում մը ունեցանք: Մեր պարտականութիւնը լիովին պիտի կատարենք, արոր վստահ եղէք: Մեր քանակի բարոյականը հիանալի է»²⁷:

Տ. Թեքեյանը վկայում է, որ Արարայի ճակատամարտից, Պաղեստինի ու Սիրիայի բազմաթիվ տարածքների ազատագրումից հետո լեգեոնականներն իրեն բազմաթիվ խանդավառ նամակներ են ուղարկել, որոնցում գերիշխում էր հետեւյալ հաղթական տրամադրությունն ու զգացողությունը. «Մենք մոլորենում ենք հայկական հողերին, վերջապէս ապացուցեցինք, որ «նապաստրակ» չենք: Կեցցէ Ֆրանսիան, կեցցէ Հայաստանը»²⁸:

²³ Անդ:

²⁴ Տնւ W. Massey, նշվ. աշխ., էջ 133:

²⁵ Տնւ «Պատմություն Ս. Դ. Հնչակեան կուսակցութեան 1887-1962», խմբագիր՝ Ա. Կիստուր, հ. Ա., Պէրյուք, 1962, էջ 531:

²⁶ Տնւ Տ. Պոյաճեան, նշվ. աշխ., էջ 142:

²⁷ Բ. Սալահ-Գիլեան, Կենսագրություն Ստեփան Սալահ-Գիլեանի, Նիւ Յորք, 1936, էջ 141:

²⁸ Շ.-Տ. Թեքեյան, Միսա լեռան հայերի փրկությունը: Հիշողության էջեր, Երեւան, 2002,

Լեգեոնականները գերեցին թշնամու 147 զինվոր, 1 մայոր եւ 3 կապիտան, որոնցից մեկը հույն էր²⁹: Թուրք մայորը զարմացավ՝ լեգեոնականների թվաքանակը տեսնելով. «Մեր զորքը բարոյալքունեցաւ այն օրէն, երբ անգլիական ժոհանաւորը թոռացիկներ թափեցին մեր վրայ, որոնցմէ ըմբռնեցինք թէ՛ այս անգամ իրենց վրայ յարձակողները ո՛չ հնդիկներ, ո՛չ ալ ալճերիացիներ եւ ո՛չ ալ եւրոպացիներ էին, այլ՝ վրիժառու հայ զունդեր, բայց չէինք կարծեր որ այդքան սակաւաթիւ էք»³⁰: Թուրք մայորը նաեւ ասել է. «Միթէ դեռ հայ կա աշխարհի վրա: Մաշալ-լահ, մաշալահ, ձեր ազգը չի մեռնի ուրեմն»³¹:

Հայ լեգեոնականները ճակատամարտում տվեցին 23 սպանված եւ 76 վիրավոր: Զոհվածների աճյունները սեպտեմբերի 20-ին թաղվեցին թիվ 26 դիրքում՝ Ռաֆաթի բարձունքի հարավ-արեւմտյան լանջին՝ գյուղից 300 մետր հեռավորության վրա՝ եղբայրական գերեզմանում³²:

Մեգիդոյի ռազմագործողության արդյունքում թուրքական բանակը ջախջախվեց բոլոր ուղղություններում: 60-րդ դիվիզիան կարողացավ գրավել թուրքական երեք պաշտպանական գծերը եւ 7.30-ին արդեն բաց էր հեծելագործի ճանապարհը դեպի թշնամու թիկունք: Գրավվեցին Թուլկարմը, Միսկեհը, Քաֆր Քասիմը եւ Ջեիս Թեփեն³³:

Շուտով հակառակորդը որոշ չափով ուշքի եկավ եւ փորձեց հակազրոհ կազմակերպել: Մի քանի դիրքերից բրիտանացիներն ստիպված էին նահանջել, սակայն ժամը 11-ի մոտ բոլոր ուղղություններում թշնամու հակազրոհները կասեցվեցին, եւ գորքերի առաջխաղացումը շարունակվեց: Թուրքական 8-րդ բանակի կենտրոն Թուլկարմում բրիտանացիների ձեռքն անցան գնացքներ, մեծ քանակությամբ տեխնիկա, զենք, զինամթերք, գերիներ: Մեկ օրում 21-րդ կորպուսի ձեռքն անցավ 7 000 գերի, 100 հրանոթ, 170 գնդացիր եւ հսկայական քանակությամբ այլ ռազմավար³⁴:

Բրիտանական հեծելազորն անցավ Մեգիդոյի կիրճը եւ սեպտեմբերի 20-ի գրավեց Աֆուլան, Նազարեթը, Ջենինը, Բեյսանը: Դրանով թուրքական բանակի թիկունքում գտնվող բոլոր երկաթուղային

էջ 61:

²⁹ Տե՛ս Մ. Աւետեան, Հայ ազատագրական ազգային յիսնամեայ (1870-1920) յուշամատեն եւ Զօր. Անդրանիկ: Վերլուծական հայեցողութեամբ եւ վաւերական տուեալներով, Փարիզ, 1954, էջ 477:

³⁰ «Պատմութիւն Ա.Դ.Հնչակեան կուսակցութեան 1887-1963», էջ 343:

³¹ Մ. Արզումանյան, Արիավիրքից վերածնունդ, Երևան, 1973, էջ 409:

³² Տե՛ս Տ. Պոյաճեան, նշվ. աշխ., էջ 147:

³³ Տե՛ս W. Massey, նշվ. աշխ., էջ 132-134:

³⁴ Տե՛ս անդ, էջ 138:

եւ ճանապարհային հանգույցները հայտնվեցին բրիտանացիների վերահսկողության տակ: Այդպիսով՝ Պաղեստինյան ռազմաճակատի թուրքական բանակը հայտնվեց շրջապատման մեջ: Փաստորեն, 22 ժամում հեծելագործը առաջացավ 80 կմ: Նրանց մուտքը Նազարեթ անսպասելի էր թշնամու համար: Թուրքական շտաբի բազմաթիվ սպաներ գերվեցին գիշերազգեստներով, իսկ շտաբի փաստաթղթերն անվնաս վիճակում ընկան բրիտանացիների ձեռքը: Թուրքական Պաղեստինյան բանակի հրամանատար Լիման ֆոն Սանդերսը հապճեպ հեռացավ քաղաքից: Սակայն Նազարեթը ամբողջությամբ գրավելու համար ծավալվեցին համառ մարտեր³⁵: Սեպտեմբերի 21-ին բրիտանական հեծելագործը հաղթական երթով անցավ Նազարեթով: Փաստորեն, առանց լուրջ դժվարության՝ բրիտանացիներին անցավ Տիբերիայից Հայֆա եւ Աքրա տանող ճանապարհը: Գններալ Չեթվուդի 20-րդ կորպուսը նույնպես հաջողությամբ կատարեց իր վրա դրված առաջադրանքը եւ լուրջ հարված հասցրեց թշնամուն:

Սեպտեմբերի 19-ի երեկոյան՝ մարտը դադարելուց հետո, Հայկական լեգեոնի Բ. գումարտակն աննկատ տեղափոխվեց թիկունք, իսկ Ա. գումարտակը զբաղեցրեց նրա դիրքերը: Սեպտեմբերի 20-ի առավոտյան ժամը 5-ին 21-րդ կորպուսի զորքերը, որոնց կազմում էր Հայկական լեգեոնը, հարձակումը շարունակելու հրաման ստացան: Սակայն պարզվեց, որ հայկական զորախմբի առաջ գտնվող դիրքերը դատարկ էին, քանի որ գիշերը թշնամին ճողոպրել էր³⁶: 54-րդ դիվիզիան յոթ ժամյա մարտերից հետո գրավեց Ազունը, որտեղ գերմանական Ասիա կորպուսի շտաբն էր տեղակայված³⁷: Սեպտեմբերի 21-ին գրավվեցին Սամարիան եւ Նաբլուսը, որը թուրքական 7-րդ բանակի կենտրոնն էր³⁸: Նահանջող թուրքական ուժերը ենթարկվեցին հրետանային եւ օդային ջախջախիչ ուժերակոծության: Թուրքական 7-րդ եւ 8-րդ բանակները ամբողջովին ոչնչացվեցին:

Թուրքերի ջախջախման ու հետապնդման գործում որոշակի ներդրում ունեցավ թուրքական բանակի հայազգի կապիտան Սարգիս Թորոսյանը, որն աչքի էր ընկել Դարդանեղի ճակատամարտում, պարգևատրվել անձամբ Էնվերի կողմից, սակայն նրա ծնողները եւ քույրը նույնպես դարձել էին Մեծ եղեռնի զոհ: Նրա երկու եղբայրները, որոնք ԱՄՆ-ում էին պատերազմի նախօրյակին, կամավորագրվել

³⁵ Տնն անդ, էջ 151-152:

³⁶ Տնն Ս. Պոյաճևան, նշվ. աշխ., էջ 123:

³⁷ Տնն W. Massey, նշվ. աշխ., էջ 170:

³⁸ Տնն անդ, էջ 173:

Էին Հայկական լեգեոնին: Մեզիդոյի ճակատամարտի առաջին օրը Ս. Թորոսյանը նշանակվել էր 7-րդ և 8-րդ բանակների համակարգող, սակայն կտրել էր հեռախոսի ու հեռագրի լարերը, նախապես ունեցած պայմանավորվածությամբ միացել արաբ ապստամբներին և 1 000 հոգանոց ջոկատով հարվածել թուրքերին թիկունքից, փակել փախուստի ճանապարհները: Մինչև Դամասկոս նա հետապնդել է թուրքերին, որի ընթացքում նրա ղեկավարած արաբական զորախմբի թիվը հասել է 6 000-ի³⁹:

Սեպտեմբերի 23-ին գրավվեց Աքրան, նույն օրը համառ մարտերից հետո՝ Հայֆան⁴⁰: Սեպտեմբերի 25-ին համառ մարտերից հետո գրավվեց Տիբերիա լճի հարավային ափին գտնվող Սամախ քաղաքը, որտեղով անցնում էր Աֆուլ-Դերա երկաթուղին, ապա՝ Տիբերիա քաղաքը⁴¹:

Ռազմաճակատի արելեյքում գեներալ Է. Չայթորսի զորքերը սեպտեմբերի 17-ից սկսեցին մեծ ակտիվություն ցուցաբերել իրենց հանձնված գծի արելեյան և հյուսիսային հատվածներում, որպեսզի այդ հատվածից գլխավոր հարձակման թյուր պատկերացում առաջացնեն հակառակորդի մոտ և ստիպեն այստեղ կենտրոնացնել ուժերը: Չայթորսի խնդիրն էր պաշտպանել Հորդանանի հովիտը և հարձակման գնացող 20-րդ կորպուսի աջ թևը: Թշնամու նահանջի առաջին նախանշանների դեպքում նա պետք է անմիջապես հարձակման գնար դեպի Էս Սալթ և Ամման, ուր օգնության էին գալու նաև Մեքքայի շերիֆի արաբական զորքերը: Սեպտեմբերի 19-21-ին թշնամին լուրջ ճնշում էր գործադրում Չայթորսի զորախմբի վրա: Սակայն շուտով թուրքերը տեղեկացան 7-րդ և 8-րդ բանակների ջախջախման, արաբների կողմից Դերայի գրավման մասին, որով փակվել էր նրանց նահանջի ճանապարհը: Դա խուճապ առաջացրեց 4-րդ բանակում և բարձրացրեց բրիտանական զորքերի մարտական ոգին⁴²: Սեպտեմբերի 22-ին Չայթորսի զորքերին հաջողվեց հյուսիսային ուղղության վրա գրավել Դամիեի կամուրջը Հորդանանի վրա, որով ճանապարհը Նաբլուսից ու Բեյսանից գնում էր Էս Սալթ: Հաջորդ օրը վերջնականապես գրավվեց Էս Սալթը, որտեղ տեղակայված էր թուրքական 4-րդ բանակի շտաբը⁴³: Բրիտանական ուժերը շարունակեցին հարձակումը և սեպտեմբերի 24-ին գրավեցին

³⁹ Տե՛ս Ս. Թորոսյան, նշվ. աշխ., էջ 176-181:

⁴⁰ Տե՛ս W. Massey, նշվ. աշխ., էջ 190, 193:

⁴¹ Տե՛ս անդ, էջ 198-200:

⁴² Տե՛ս H. Gullett, The Australian Imperial Force in Sinai and Palestine, 1914-1918 (10th edition), Sydney, 1941, էջ 714-717:

⁴³ Տե՛ս W. Massey, նշվ. աշխ., էջ 208:

Ամմանի հյուսիսում գտնվող Սուվեյլե և արևմուտքում գտնվող Նիմրին բնակավայրերը: Սեպտեմբերի 25-ի արշավույսին սկսվեց Ամմանի գրոհը: Համառ մարտերից հետո այն վերջապես գրավվեց, և բրիտանացիների վերահսկողության տակ անցավ Հեջազի երկաթուղին⁴⁴:

Հարձակման հաջողությանը նպաստեց այն, որ էմիր Ֆեյսալի արաբական բանակը սեպտեմբերի 16-ից մոտեցավ Դերային, որտեղից բաժանվում էր Դամասկոսից դեպի Բեյսան և Ամման գնացող երկաթուղին: Սեպտեմբերի 17-ին արաբները գրավեցին Դերայից հյուսիս գտնվող Թել Արար կայարանը, պայթեցրին երկաթուղու մոտ 15 կիլոմետրանոց հատված, փակեցին ճանապարհը: Սեպտեմբերի 23-ին արաբները գրավեցին Դերան⁴⁵: Արդյունքում թուրքական 4-րդ, 7-րդ և 8-րդ բանակները չկարողացան երկաթուղով օգնական ուժեր ստանալ Դամասկոսից, իսկ պարտությունից հետո չկարողացան զորքերն ու տեխնիկան տեղափոխել թիկունք:

Հետագա օրերին բրիտանացիները շարունակեցին շրջապատման մեջ մնացած թուրքական բանակի մնացորդների վնասագերծումը: Թուրքական Պաղեստինյան բանակն ամբողջությամբ ոչնչացվեց: Սպանվեցին ու գերվեցին տասնյակ հազարավոր զինվորներ: Միայն 5-6 000 զինվորների հաջողվեց փախուստի դիմել:

Մեզիդյի ճակատամարտում առաջին անգամ հեծելագործը և օդուժը համատեղ, արդյունավետ համագործակցությամբ վարեցին գրեթե ամբողջ հարձակողականը: Օդուժը շարքից հանեց թշնամու կապի միջոցները, մեծ արդյունավետությամբ ոչնչացրեց թշնամու տեխնիկան և մարդուժը, հետախուզական անուրանալի ծառայություն մատուցեց հարձակվող բանակին:

1918 թ. սեպտեմբերի 19-25-ը տեղի ունեցած Մեզիդյի հաղթական ճակատամարտի արդյունքում Միջերկրականից մինչև Մեոյալ ծով ձգվող թուրքական ամբողջ ճակատը քայքայվեց, իսկ «Յըլդըրըմ» բանակը ցաքուցրիվ եղավ⁴⁶:

Ինչպես տեսանք, Հայկական լեգեոնի հաջողությունը նույնպես նպաստեց դաշնակից ուժերի հաղթանակին: Ֆրանսիան որոշեց օգտվել իր դրոշի ներքո կռվող հայ կամավորների սխրանքից՝ սեփական հեղինակությունը բարձրացնելու նպատակով: «Մարտական խաչ» շքանշանով պարգևատրվեցին 25 լեգեոնականներ⁴⁷: Արարայում ցու-

⁴⁴Տե՛ս անդ, էջ 211:

⁴⁵Տե՛ս F. Cutlack, The Australian Flying Corps, էջ 162-163:

⁴⁶Տե՛ս S. Պոյաճևան, նշվ. աշխ., էջ 153:

⁴⁷Տե՛ս Կ. Հարությունյան, Ֆրանսիական բանակի Հայկական լեգեոնը 1916-1920 թվական-

ցարերած խիզախության համար շքանշաններ ստացան հայ սպաներ Վահան Փորթուգալյանը, Զոն Շիշմանյանը, Հարություն Եսայանը, Հակոբ Արեւյանը, Հակոբ Գարասեֆերյանը⁴⁸:

Գնդապետ դը Պիեպպար սեպտեմբերի 21-ին Կահիրեում ֆրանսիական դեսպան Պիեր Լեֆեր-Պոնտալիսին ուղարկած նամակում գրում էր. *«Արևելյան լեգեոնն ի հայտ է բերել ամենամեծ խիզախության վկայություն, պահպանելով իր գրաված դիրքերը, չնայած Արաբայից տեղացող սարսափելի կրակին. այն այդպեղ կրել է զգալի կորուստներ»*⁴⁹:

Իր հերթին Լեֆեր-Պոնտալիսը սեպտեմբերի 26-ին Ֆրանսիայի արտգործնախարար Ստեֆան Պիշոնին ուղարկած նամակում մեծ գովեստով էր խոսում Հայկական լեգեոնի մասին: Նշում էր, որ լեգեոնն իր արդյունավետությամբ գերազանցել է այն ջանքերը, որոնք գործադրվել էին այն կազմակերպելու համար: Դեսպանը հայտնում էր, որ բրիտանացիները մինչև ճակատամարտը անվստահությամբ էին վերաբերվում այդ զորամիավորմանը: Դեսպանը գտնում էր, որ չնայած բրիտանացիների համեմատությամբ իրենք երկրորդական դեր ունեն Պաղեստինյան ճակատում, սակայն պետք է մամուլով տեղեկացնել լեգեոնի եւ ֆրանսիական մյուս զորամասերի սխրանքների մասին, քանի որ դա քաղաքական առումով կնպաստի Ֆրանսիայի հեղինակության բարձրացմանը: Նա տեղեկացնում էր, որ Ալենքիս իրեն ուղարկած հեռագրով ընդունել էր ֆրանսիական զորքերի ցուցաբերած քաջությունն ու անվեհերությունը⁵⁰:

Սեպտեմբերի 29-ին Եգիպտոսի ֆրանսիական դիվանագիտական գործակալությունը հետեւյալ պաշտոնական հաղորդագրությունը տարածեց. *«Գններալ Ալլենքիսի գերագույն հրամանադրարության ներքո դրված ֆրանսիական զորքերը Պաղեստինի հարձակման ժամանակ ցուցաբերել են ցանկացած զոհվարից վեր կանգնած մեծ փոկունություն եւ խիզախություն, որոնց գլխավոր հրամանադարը բարեհաճել է մատուցել հարգանքի սուսնձնասհափույթ փութք:*

Հրաձիգների գունդը գրավելով Երեք մացառույթների եւ Սուրի բլուրի դիրքերը, մեկ ժամից էլ պակաս ժամանակամիջոցում գերեվարել է

ներին, ՊԲՀ, 1999, թ. 2-3, էջ 107:

⁴⁸ Տե՛ս «Ատանայի Հայոց պատմություն», էջ 430:

⁴⁹ Ա. **Պեյլերյան**, Մեծ տերությունները, Օսմանյան կայսրությունը եւ հայերը ֆրանսիական արխիվներում (1914-1918), առաջաբանը՝ Ժան-Բատիստ Դյորոզելի, ֆրանսերենից թարգմանեց Վ. Պողոսյանը, հ. Բ., Երևան, 2005, էջ 374:

⁵⁰ Տե՛ս անդ, էջ 374-375:

13 թուրք սպաների, այդ թվում՝ մեկ հրամանապարի, 200 գերու եւ գրավել է մեծ քանակությամբ գնդացիներ:

Մյուս կողմից, Արեւելյան լեզեոնն ի հայտ է բերել ամենամեծ խիզախություն՝ պահպանելով իր դիրքերը, չնայած Արարայում փեղակալված թուրքական մարտկոցներից փեղացող ահաբեկու կրակին: Միրիական վաշտն ի հայտ է բերել մեծ արժանիքներ՝ դիմանալով Ռաֆայում մահ ափոռող ուժակոծությանը:

Եգիպտոսում Ֆրանսիայի դիվանագիտական գործակալությունը հպարտ է, քանի որ կարող է հիացմունքի փուրք մատուցել հայերին ու սիրիացիներին, որոնք ֆրանսիական բանակի շարքերում հենց նոր դրսևորել են իրենց հայրենասիրությունն ու ուզմական անվեհերությունը»⁵¹:

Պաղեստինում Ֆրանսիայի գերագույն կոմիսարի ժամանակավոր պաշտոնակատար Կուլոնդրի եւ իր անունից Լեֆեր-Պոնտալիսը սեպտեմբերի 26-ին շնորհավորական ուղերձ էր ուղարկել նաեւ Եգիպտոսի հայ ազգային միության նախագահ Լեոն Մկրտիչյանին, որտեղ գովաբանում էր Հայկական լեզեոնի սխրանքը: Հոկտեմբերի 1-ին ուղարկված պատասխանում Լ. Մկրտիչյանը հայտնում էր, որ հայերը հպարտ եւ ուրախ են լեզեոնի ձեռքբերումների համար: Նշում էր, որ հաջողության համար պարտական են առաջին հերթին գնդապետ Լուի Ռոմիոյի ջանքերին, որը զորամասը հեռու պահեց կուսակցությունների միջատություններից եւ դարձրեց կոռ կառույց: Նա շնորհակալություն էր հայտնում Ֆրանսիային, որ կազմավորեց ու մարզեց այդ զորամասը: Լ. Մկրտիչյանը նաեւ ակնարկեց, որ Արեւելյան լեզեոնը հիմնականում հայերից է կազմված եւ միայն բռնություններից խուսափելու համար է, որ ժամանակին չեն կոչել Հայկական լեզեոն⁵²:

Հոկտեմբերի 4-ին «Թայմսը» հրատարակեց լորդ Ռոբերտ Սեսիլի հետեւյալ խոսքերը. «Հայկական զորքերը, ծառայելով բրիտանական, ֆրանսիական բանակներում, ինչպես նաեւ ամերիկյան բանակում, իրենց պարվավոր բաժինն ունեն գեներալ Ալենքիի մեծ հաղթանակում Պաղեստինում Հայաստանի վերաբերյալ դաշնակիցների քաղաքականությունը չի փոխվել»⁵³:

Հոկտեմբերի 9-10-ին ֆրանսիական մամուլը հրատարակեց հետեւյալ հաղորդագրությունը. «Ֆրանսիական հրամանապարտության փակ

⁵¹ Անդ, էջ 375:

⁵² Տե՛ս անդ, էջ 376-377:

⁵³ ՀԱԱ, ֆ. 200, ց. 1, գ. 131, թ. 19-20:

կովող գորքերի մեջ է Հայկական լեզեոնը, որը ակրիվորեն մասնակցում է Սիրիայի ազատագրմանը: Այդ գործումսը միացված է ֆրանսիականին և կովում է ֆրանսիացի սպանների հրամանատարության տակ: Այս վերջին շարաթների բոլոր գործողություններում հայկական գորքերը ցույց տվեցին իրենց զինվորական լավագույն հատկությունները և ամենամեծ արժանիքը: Սիրիայում դաշնակցային գորքերի գլխավոր հրամանատար գեներալ Ալենքին հաստատեց այդ արժանիքը Հայ ազգային պատվիրակության նախագահ Պողոս Նուրարին ուղարկած հեղինակալ հեռագրով. «Հպարտ եմ, որ Ձեր հայրենակիցները ակրիվ դեր խաղացին կովում և մասնակցեցին մեր մեծ հաղթանակին»: Իր կողմից ֆրանսիական գորքերի հրամանատարը, որի հրամանատարության տակ կովում են նրանք, լույս ափոեց այդ քաջարի գորքերի արժանիքների, տոկոնության և եռանդի վրա, որոնց հավաքարմությունը դաշնակիցներին անխախտ է մնացել և պարիվ է բերում ֆրանսիական դրոշին, որի տակ են գրնվում նրանք»⁵⁴:

Արեւելքում դաշնակից գորքերի գլխավոր հրամանատար Ալենքին նույնպես բարձր գնահատեց հայ կամավորների սխրանքը: Հոկտեմբերի 12-ին Հայ ազգային պատվիրակության նախագահ Պողոս Նուրար փաշային ուղարկած հեռագրում նա նշում էր. «Հպարտ եմ, որ իմ հրամանատարության տակ ունեմ հայկական գունդ: Հայերը փայլուն կերպով կովեցին և մեծ մասնակցություն ունեցան իմ հաղթանակում»⁵⁵: Իսկ Եգիպտոսի հայ ազգային միության ուղարկած շնորհավորանքներին Է. Ալենքին պատասխանեց. «Ջերմապես շնորհակալ եմ ձեր շնորհատրտություններուն համար, և հպարտ եմ այն իրողութեամբ, որ Արեւելեան Լեզեոնի ձեր հայրենակիցները գործօն բաժին մը վերցուցին կոտին մէջ, և մասնակից եղան մեր յաղթանակին»⁵⁶:

Այսպիսով՝ Ֆրանսիայի դրոշի ներքո կովող Հայկական լեզեոնը որոշակի ներդրում է ունեցել Պաղեստինի թուրքական ռազմաճակատի ջախջախման գործում, որը բարձր է գնահատվել գլխավոր հրամանատար Ալենքիի, ինչպես նաև ֆրանսիական ղեկավարության կողմից: Հայ մարտիկների քաջությունն ու բարձր մարտունակությունը Ֆրանսիան փորձել է օգտագործել սեփական հեղինակությունը բարձրացնելու նպատակով: Թուրքերի ջախջախման գործում ներդրում է ունեցել նաև Ս. Թորոսյանը, որի ղեկավարած արաբական զորամասը փակել է թուրքերի նահանջի ուղին, ապա հետապնդել է մինչև Դամասկոս և

⁵⁴ Անդ, թ. 23: «Պատմություն Ս. Դ. Հնչակեան կուսակցութեան», էջ 532:

⁵⁵ ՀԱԱ, ֆ. 200, ց. 1, գ. 131, թ. 25: Նաև՝ ֆ. 430, ց. 1, գ. 1320, թ. 11:

⁵⁶ Մ. Տամատեան, Իմ յուշերէս, Պէյրոս, 1985, էջ 123:

առաջիններից մեկն է մտել քաղաք: Ինչպես տեսնում ենք, հայկական զինուժն իր դերակատարությունն ունեցավ ցեղասպան պետության ջախջախման գործում, որով հայ կամավորները որոշ չափով լուծեցին մորթված մեկ ու կես միլիոն անմեղ ազգակիցների վրեժը:

РЕЗЮМЕ

Армянский легион, который воевал под французским флагом имел участие в разгроме палестинского турецкого фронта. Он отличился в битве при Мегиддо. Капитан турецкой армии Саркис Торосян присоединившиеся арабским повстанцам, возглавил арабский полк и закрыл путь отступления турецкой армии. Он преследовал их до Дамаска. Таким образом, армянские силы играли определенную роль в разгроме турок, и так в какой-то степени армянские добровольцы отомстили за полтора миллиона невинных соотечественников убитых во время Геноцида Армян.

SUMMARY

The Armenian Legion fighting under French flag had part in crushing of the Palestinian turkish front. He distinguished himself at the Battle of Megiddo. Captain of turkish army Sargis Torosian, who had joined the Arab rebels, leding Arab army blocked the Turkish retreat path, then chased up to Damascus. Thus, the armenian forces play some role in crushing of turks, and so in some extent armenian volunteers took revenge for one and a half million innocent compatriots murdered during the Armenian Genocide.

